



REPUBLIKA E KOSOVËS / REPUBLIKA KOSOVA

K.DH.SH.II.nr.937/23

GJYKATA KOMERCIALE E KOSOVËS – Dhomat e Shkallës së Dytë, në kolegjin e përbërë nga gjyqtarët: Krenar Berisha kryetar, Dren Rogova dhe Ramush Bardiqi, anëtarë, në konfliktin administrativ të paditësit Instituti i Shkencës dhe Teknologjisë INSI shpk me seli në Prishtinë, të cilin sipas autorizimit e përfaqëson Qëndrim Arifi avokat nga Prishtina, kundër të paditurës Organi Shqyrtues i Prokurimit me seli në Prishtinë, rr. Migjeni, me bazë juridike, anulim vendimi, me kërkesë për shtyrjen e ekzekutimit të njëjtit, duke vendosur lidhur me ankesën e paditësit të ushtruar kundër Aktvendimit të Gjykatës Komerciale të Kosovës-Dhomat e Shkallës së Parë-Departamenti për çështje administrative, K.A.nr.210/2023 të datës 24.05.2023, në seancën e kolegjit të mbajtur me datë 20.07.2023, merr këtë:

A K T V E N D I M

Refuzohet si e pabazuar ankesa e paditësit Instituti i Shkencës dhe Teknologjisë INSI shpk me seli në Prishtinë, ndërsa Aktvendimi i Gjykatës Komerciale të Kosovës - Dhomat e Shkallës së Parë, Departamenti për çështje administrative, K.A.nr.210/2023 i datës 24.05.2023, Vërtetohet

A r s y e t i m i

Me Aktvendimin e ankimuar të Gjykatës Komerciale të Kosovës-Dhomat e Shkallës së Parë-Departamenti për çështje administrative, është Refuzuar si e pabazuar kërkesa e paditësit Instituti i Shkencës dhe Teknologjisë INSI shpk me seli në Prishtinë, me të cilën ka kërkuar shtyrjen e ekzekutimit të vendimit PSH nr.19/23 datës 26.04.2023 i nxjerr nga i padituri Organi Shqyrtues i Prokurimit me seli në Prishtinë, derisa gjykata të vendos me vendim përfundimtar gjyqësor përkitazi me padinë e paditësit.

Kundër këtij aktvendimi ka ushtruar ankesë përfaqësuesi i autorizuar i paditësit Avokatura Arifi&Partners shpk në Prishtinë, me të cilën e ka kundërshtuar ligjshmërinë e të njëjtit, për shkak të konstatimit të gabuar dhe jo të plotë të gjendjes faktike, dhe zbatim të gabuar të dispozitave të LKA-së, me propozimin që të aprovohet si e bazuar ankesa e paditësit, të Ndryshohet aktvendimi i atakuar, ose lënda të kthehet në rivendosje në Dhomat e shkallës së parë.



Dhomat e Shkallës së Dytë e Gjykatës Komerciale të Kosovës, shqyrtoi shkresat e lëndës, aktvendimin e ankimuar, pretendimet ankimore, dhe pas vlerësimit të tyre në kuptim të nenit 12 të Ligjit 08/L-015, dhe nenit 49 të LKA-së, ka gjetur se:

Ankesa është e pabazuar

Duke shqyrtuar shkresat e lëndës, aktvendimin e kundërshtuar sipas ankesës së paditësit, Dhomat e shkallës së dytë, gjen se Dhomat e shkallës së parë, pas shqyrtimit të propozimit të paditësit, për shtyrjen e ekzekutimit të vendimit PSH nr.19/23 datës 26.04.2023 i nxjerr nga i padituri Organi Shqyrtues i Prokurimit me seli në Prishtinë, ka gjetur se nuk janë plotësuar kushtet ligjore për shtyrjen e ekzekutimit të aktit administrativ të kontestuar, pasi që pretendimet e paraqitura në propozim nuk kanë mbështetje ligjore, paditësi nuk e ka argumentuar faktin se ekzekutimi i vendimit do ti sillte dëm i cili vështirë do të riparohej, Me pezullimin e aktivitetit të prokurimit do ti pamundësohej autoritetit kontraktues që të shpall përsëri njoftimin për këtë aktivitet ekonomik. Paditësi nuk ka arritur të argumentoj plotësimin e kushteve të përcaktuara me nenin 22 par.2 të LKA-së.

Dhomat e Shkallës së Dytë, duke u nisur nga gjendja e tillë e çështjes, pranon në tërësi si të drejtë dhe të ligjshëm qëndrimin e tillë të Dhomes së shkallës së parë, nga se edhe sipas vlerësimit të kolegjit të kësaj gjykate, në rastin konkret nuk janë plotësuar në mënyrë kumulative kushtet për shtyrjen e ekzekutimit të aktit administrativ të paraparë në nenin 22 par.2 të Ligjit për Konfliktet Administrative.

Me këtë dispozitë juridike është paraparë që shtyrja mund të bëhet: nëse ekzekutimi i aktit administrativ do t'i sillte dëm paditësit, i cili vështirë do të riparohej, kurse shtyrja nuk është në kundërshtim me interesin publik, e as që shtyrja do ti sillte ndonjë dëm palës kundërshtare përkatësisht personit të interesuar.

Mbi këtë gjendje të fakteve, Kolegji gjen se Dhoma e shkallës së parë, në mënyrë të drejtë ka vërtetuar gjendjen faktike dhe drejtë ka zbatuar dispozitat procedurale dhe materiale, me rastin e refuzimit të kërkesës së paditësit, me të cilën ka kërkuar shtyrjen e ekzekutimit të vendimit PSH nr.19/23 datës 26.04.2023 i nxjerr nga i padituri Organi Shqyrtues i Prokurimit me seli në Prishtinë, dhe se nuk është cenuar ligji në dëm të ankuesit, me rastin e refuzimit të propozimit për shtyrjen e ekzekutimit të njoftimit të kundërshtuar. Meqë në këtë rast paditësi, në ankesën e ushtruar nuk ka bërë të besueshme pretendimet e tij, se janë plotësuar në mënyrë kumulative kushtet për shtyrjen e ekzekutimit të aktit administrativ, e me të cilin do të arsyetohej shtyrja e ekzekutimit të vendimit duke ju referuar dispozitave ligjore, të nenit 22 par.2 të LKA-së, prandaj, pretendimet ankimore se Dhomat e shkallës së parë me rastin e marrjes së aktvendimit, ka vërtetuar në mënyrë të gabuar dhe jo të plotë faktet nga shkresat e lëndës, janë të pabazuara dhe të paqëndrueshme. Sepse, sipas vlerësimit të Kolegjit të kësaj gjykate aktvendimi i atakuar i gjykatës së shkallës së parë, është i qartë dhe i kuptueshëm, ndërsa në arsyetimin e tij janë dhënë arsye të mjaftueshme për faktet vendimtare të cilat i pranon edhe Dhomat e shkallës së dytë.



Kolegji i Dhomave të shkallës së dytë, vlerësoi si të pabazuara pretendimet ankimore të paditësit, se me inicimin e ri të aktivitetit të rishpallur "Master plani për rigjenerimin e lagjes Kolovica" nga Komuna e Prishtinës, do ti sillte dëm paditësit, duke krijuar kushte për zgjerimin e padisë, dhe atë për fitimin e humbur për shkak të pamundësisë së shpërblimit me kontratë. Kolegji vlerësoi se nuk janë përmbushur kushtet ligjore për shtyrjen e ekzekutimit të vendimit të ankimuar, siç parashihet në nenin 22 par.2 të LKA-së. Sepse, kërkesa e paditësit për shtyrjen e ekzekutimit të aktit administrativ, tërësisht është e mbështetur në faktet që kanë të bëjnë me çështjen kryesore, për të cilat gjykata do të vendosë në mënyrë meritore pas administrimit të provave dhe shqyrtimit të kërkesëpadisë për anulimin e vendimit të kontestuar, por të cilat tani nuk janë me ndikim për vlerësimin e besueshmërisë së kërkesës për shtyrjen e ekzekutimit të vendimit të kontestuar.

Kolegji pajtohet me pikëpamjet juridike të Dhomave të shkallës së parë, pasi që përfundimi i saj është i rregullt dhe i ligjshëm, se aktvendimi i atakuar nuk është i përfshirë në shkelje thelbësore të dispozitave procedurale, apo kontestimore, dhe zbatim të gabuar të së drejtës materiale, për të cilat shkaqe gjykata kujdeset sipas detyrës zyrtare në kuptim të dispozitës së nenit 194 të LPK-së, por as me shkelje të cilat pretendohen me ankesë.

Mbi këtë gjendje të fakteve, Kolegji gjen se Gjykata e Komerciale e Kosovës, Dhomat e Shkallës së Parë-Departamenti për çështje administrative, në mënyrë të drejtë ka vërtetuar gjendjen faktike dhe drejtë ka zbatuar dispozitat procedurale dhe materiale, me rastin e refuzimit të propozimit të paditësit, me të cilën ka kërkuar shtyrjen e ekzekutimit të vendimit PSH nr.19/23 datës 26.04.2023 i nxjerr nga i padituri Organi Shqyrtues i Prokurimit me seli në Prishtinë, derisa gjykata të vendos me vendim përfundimtar gjyqësor përkritazi me padinë e paditësit, Andaj, ankesa si e tillë refuzohet, ndërsa aktvendimi i ankimuar vërtetohet si i drejtë dhe i ligjshëm.

Nga sa u tha më lartë, e në bazë të nenit 12 të Ligjit 08/L-015, dhe nenit 49 të LKA-së, u vendos si në dispozitiv të këtij aktvendimi.

GJYKATA KOMERCIALE E KOSOVËS
Dhomat e Shkallës së Dytë
K.DH.SH.II.nr.937/23 datë 20.07.2023

Kryetari i Kolegjit
Krenar Berisha

